

АКАФИСТ трем велицым святителям Василию Великому, Григорию Богослову и Иоанну Златоустому

Кондак 1

Избраннии светильницы Церкви Христовы, Василие, Григорие и Иоанне, ученьми вашими мир просветившии и вся шатания ересей и хульных смущения угасившии! Яко ходатаи спасения нашего суще, молитвами вашими сохраните ны от всяких бед и вечных мук, да с радостию благодаряще вопием вам:

Радуйтеся, трие святителие, велицыи и вселенстии учителяе.

Икос 1

Ангели земнии и человецы небеснии, святителие Христовы и отцы треблаженнии, поборницы Живоначальныя Троицы, от Нея светом трисолнечным осияваемии и молящиися непрестанно у престола Триипостаснаго Божества о душах наших, услышите ны, от сердца к вам взывающия:

Радуйтеся, имущии дерзновение вопити о нас ко Господу; радуйтеся, велицыи угодницы Святыя Троицы.

Радуйтеся, дарованьми единосветности; радуйтеся, апостолом единомыслии.

Радуйтеся, яко вашими ученьми дивно просия благодать Христова; радуйтеся, разум свой в послушание веры пленившии.

Радуйтеся, блазии делателие винограда Христова; радуйтеся, от юности Богом благословеннии.

Радуйтеся, скорби жития сего добре претерпевшии и данный вам талант приумножившии; радуйтеся, волю Божию сильным мира сего со многим дерзновением благовестившии.

Радуйтеся, тму нечестия отгнавшии; радуйтеся, всю подсолнечную зарями догматов просветившии.

Радуйтеся, трие святителие, велицыи и вселенстии учителяе.

Кондак 2

Видя еретичествующих лютая стремления, мечь острейший противу сетей лжеучений и огонь, плевелы суемудрия поядая,

святой Василий явися и, яко пастырь изряднейший, обличив лесь идольскую своим богодухновенным вещанием, научи ны почитати Святую Троицу, разделену убо ипостасьми, соединену же существом, и вопити Ей: Аллилуия.

Икос 2

Разум озарен благодатию Христовою имуще, яко апостолом единомравнии, православных догматов учения уясните и трие велиции светильницы Триипостаснаго Божества явистесь; вашими бо вдохновенными писаньми озаряема, Церковь Христова светло красуется, и верная чада ея в меру возраста исполнения Христова восходят. Темже взирающе на богатство благодати Христовы, вам дарованныя, яко просветители наша восхваляем вы, вопиюще таковая:

Радуйтесь, богоноснии небеснии таинницы; радуйтесь, покаяния немолчнии проповедницы.

Радуйтесь, сосуди избранныи; радуйтесь, премудрии учителяе вселенныя.

Радуйтесь, в Божественных учениях Христовых люди наставившии; радуйтесь, в повелениях Господних всегда усердно ходившии.

Радуйтесь, многообразных добродетелей образы в вашем житии явившии; радуйтесь, столпи непоколебимии, веру Христову Божественными догматы утвердившии.

Радуйтесь, словесное стадо Христово мудре упасшии; радуйтесь, Православия изряднейшии богослови.

Радуйтесь, светила, вся концы земли просвещающая; радуйтесь, свирель и цевнице сладкозвучная.

Радуйтесь, трие святителие, велиции и вселенстии учителяе.

Кондак 3

Сила молений отчих понуди святаго Григория Понт оставити и в Назианз ко отцу своему, помощи ради ему, преселитися, идеже славу Божию ученьми и делы вещаше и ересь арианскую посрамляше. Темже и нас, великий святителю Григорие,

Божественнаго рая нетленныя проходя пажити, поминай у престола Святыя Троицы, да умилением взываем Ей: Аллилуия.

Икос 3

Имуще в сердцах светоносную благодать Святыя, Единосущныя и Нераздельныя Троицы, трие богопроповедницы, разделеннии телесы и совокупленнии духом, благочестно яве проповедаша Троицу Едину неперемнную, Существо же и Божество, и сию проповедь страданьми запечатлеша. Темже и мы, подражающе вере их, вопием таковая:

Радуйтесь, сильнии и непоборимии Церкви Христовы споборницы; радуйтесь, истины Христовы усерднии ревнители.

Радуйтесь, ко Пресвятей Троице молитвенницы теплии; радуйтесь, Церкви Христовы пастырие добрии.

Радуйтесь, Ария низложившии и православныя утвердившии; радуйтесь, Троицу Едину Неперемнную, Существо и Божество, деяньми и ученьми прославившии.

Радуйтесь, Отца, и Сына, и Святаго Духа, Троицы ипостаси, дивно уяснившии;

радуйтесь, Трисятельного ради и Единого Божества величайшия скорби и гонения претерпевшии.

Радуйтесь, тяготу дневную до скончания своего жития неослабно понесшии; радуйтесь, ночь мрачную злочестивых ересей лучами богомудрых догматов отгнавшии.

Радуйтесь, души верных благодатно напитавшии; радуйтесь, Царствия вечнаго наследницы быти сподобившиися.

Радуйтесь, трие святителие, велицыи и вселенстии учителяе.

Кондак 4

Бурю ярости и гнева воздвигоша, о Златоусте, безумнии людие, клеветуше на тя и изгнати от царствующаго града повелевающе. Ты же, Златослове, на камени веры Христовы непоколебимо пребывая и благодатию Святаго Духа укрепляем, бурю гонений и мучений мужественно претерпел еси и страданьми венец нетленный на небесех себе уготовал еси,

научая всех в терпении нести крест Христов и взывати Богу: Аллилуия.

Икос 4

Слышаще богодухновенная словеса ваша, запечатленная многими подвиги и страданьми, жаждущии глаголов жизни вечныя издалеча к вам приходяду, и нетленную пищу от вас приемше и божественнаго пития почерпше, взываху вам сицевая:

Радуйтесь, глубины слова Божия добре испытавшии; радуйтесь, непрестанным рачением Бога взыскавшии.

Радуйтесь, алчущих правды питателие; радуйтесь, нищих духом утешителие.

Радуйтесь, облацы, источающии росу учений благочестивых и напаяющии вселенную; радуйтесь, приснотекущая реки духовныя, напаяющия верных чад Церкви Христовы.

Радуйтесь, Божественных таин хранителие и словесныя трубы Божия; радуйтесь, правыя веры и благочестия христианского насадителие.

Радуйтесь, чудесы многими верныя озаряющии; радуйтесь, реки врачеваний нам проливающии.

Радуйтесь, усердно притекающия к вам от искушений и напастей молитвами вашими охраняющии; радуйтесь, всего рода христианскаго похвало.

Радуйтесь, трие святителие, велицыи и вселенстии учителяе.

Кондак 5

Боготечную звезду Христос миру показа тя, великий во иерарсех Василие; стяжав бо ведение Божественных таин и озарение свыше от престола благодати Божия, умы и сердца верных богодухновенными словесы дивно просветил еси, любовью же к Богу одушевляем, гонения и страдания за Христа добре претерпел еси и сего ради сподобился еси на небесех молитвеннаго дерзновения у престола Царя славы, образ быв верным словом, житием, духом, любовью, верою и чистотою, да вси со умилением вопиют Пресвятей Троице: Аллилуия.

Икос 5

Видяще вас, святителие Христовы, небесным ликостоянием присно спребывающия и престолу Божию всегда предстоящия, со умилением воспеваем возвеличившую вас Живоначальную Троицу, Юже словом и житием вашим прославили есте, вам же, молитвенником изряднейшим, от любве сердечныя вопием:

Радуйтесь, горним ликом совокупленнии и святых ангел сожителие; радуйтесь, престолу Царя славы предстоящии присно со всеми избранными.

Радуйтесь, славою небесною украшеннии; радуйтесь, плоть и мир возненавидевшии.

Радуйтесь, вся сокровища мира и житейския сласти Христа ради во уметы вменившии; радуйтесь, на светозарную добродетелей колесницу возшедшии и небеснаго Царствия достигшии.

Радуйтесь, и нам, грешным, образ добродетелей словом и житием явившии; радуйтесь, многими скорбьми вшедшии в радость Господа своего.

Радуйтесь, теплии о нас пред Богом ходатаи; радуйтесь, православнаго богословия светила изряднейшая.

Радуйтесь, веры христианския похвало; радуйтесь, святителей славо и Церкви украшение.

Радуйтесь, трие святителие, велицыи и вселенстии учителяе.

Кондак 6

Проповедуя истину боговещанными твоими глаголы, сокрушил еси, богослове Григорие, еллинская суемудрия и ересей соблазны, вселенней же всей немолчно проповедал еси в Троице славимаго Бога Единосущнаго, Отца и Сына и Духа Святаго, научая всех вопити Ему: Аллилуия.

Икос 6

Возсиясте светом добродетельнаго жития и православныя веры исповеданием во всю вселенную и всем языком свет истиннаго богопознания уясните, якоже быти вам пастырем и

учителем всея Церкви Христовы. Темже и по смерти не престаите приизирати на ны, тепле вам молящихся и взывающих:

Радуйтеся, три светила великая, путеводящая нас ко спасению; радуйтеся, просветителие сидящих во тме неведения.

Радуйтеся, недомысленныя тайны Триипостаснаго Божества нам уясняющии; радуйтеся, струями мудрых учений паству свою напаяющии.

Радуйтеся, пастырие изряднейшии, житие свое всякими добродетельми благоукарасившии; радуйтеся, стадо свое от волков хищных соблюдшии.

Радуйтеся, светильницы Трисолнечнаго Света, умы и сердца верных дивно озаряющии;

радуйтеся, образы целомудрия, ревновати о стяжании сея добродетели нас научающии.

Радуйтеся, церковная кормила, путь православнаго боговедения ясно показующая;

радуйтеся, дванадесяти апостолом единомравнии.

Радуйтеся, ангельских ликом сожителие; радуйтеся, купно со всеми святыми непрестанно молящиися о нас.

Радуйтеся, трие святителие, велицыи и вселенстии учителяе.

Кондак 7

Хотя змий лукавый искусити тя, якоже Иова многострадальнаго, воздвиже бурю злобы нечестивых, изгнавших тя в заточение. Обаче благодатию Христовою укрепляем, всякая злострадания и болезни добре претерпел еси, отче Иоанне Златоусте, и блаженныя кончины сподобился еси. Ныне же, пребывая в невечернем дни Царствия Христова, не престаи молитися за ны у престола Триипостаснаго Бога, да со умилением вопием: Аллилуия.

Икос 7

Новии светильницы светозарнии и Церкви непоколебимии столпы явистесе, святителие велицыи: святостию бо жития вашего, еще во плоти суще на земли, бесте яко безплотни. Сего

ради Церковь Христова, присно прославляючи вас, благодарственная пения восписует Светодавцу Христу Богу, Егоже благодатию укрепляеми, велия болезни претерпесте и труды понесосте во благовестии Христове. Темже прославляюще Христа, непрестанно благодеющего Церкви Своей святей, восхваляем и вас, яко верных слуг Христовых и строителей таин Божиих, вопиюще сицевая:

Радуйтесь, вернии Троицы поборницы; радуйтесь, Православия непобедимии исповедницы.

Радуйтесь, иерархов священноначальницы; радуйтесь, лучами богословия вашего ересей неистовство разрушившии.

Радуйтесь, пресветлии благочестия образи; радуйтесь, верныя в боговедении утвердившии.

Радуйтесь, слова Божия богодухновеннии изъяснителие; радуйтесь, Владыки Христа раби блазии и вернии.

Радуйтесь, кротость Моисееву и ревность Илиину в подвизех своих воплотившии;

радуйтесь, терпением скорбей и гонений древнему Иову подражавшии.

Радуйтесь, Иосифа целомудрием и чистотою украшеннии; радуйтесь, Петрово исповедание и Иоанново богословие показавшии.

Радуйтесь, трие святителие, велиции и вселенстии учителяе.

Кондак 8

Странное чудо благодати дарованныя тебе, святителю Василие, уведе на себе Ефрем Сирианин, егда восхотевшу ему видети тя, ты, отче, послал еси архидиакона своего привести его к тебе, и молитвою твоею Ефрем уразуме язык еллинский и, чудеси дивяся, прослави Бога, поя Ему: Аллилуия.

Икос 8

Всю веру во Святую Троицу непорочну сохранисте и многи ко Христу приведосте, святителие Христовы, подвигом добрым

подвигшеся. Сего ради, взирающе на дивный подвиг ваш и на чистое житие ваше, со умилением вопием вам таковая:

Радуйтесь, Православия одеждою, свыше истканною, Церковь украсившии; радуйтесь, еретическая суесловия ясно обличившии.

Радуйтесь, писаньми и словесы вашими духовное сокровище Церкви Христове собравшии; радуйтесь, мудрость земную и вся красная мира, Христа ради, отвергшии.

Радуйтесь, сокровищ небесных паче всего взыскавшии; радуйтесь, Пастыреначальника Христа, яко служителие вернии, живоносным стопам последовавшии.

Радуйтесь, высокий образ добродетелей в житии вашем явившии; радуйтесь, душевныя страсти, вкупе же и телесныя, духовным мечем посекшии.

Радуйтесь, Живоначальной Троице в жертву живу, святу и благоугодну себе самих принесшии; радуйтесь, грешников предстателие.

Радуйтесь, нищих заступницы; радуйтесь, пастырей учителяе и образи.

Радуйтесь, трие святителие, велицыи и вселенстии учителяе.

Кондак 9

Всею душею твоею возлюбив Бога, отче Григорие, боговидную чистоту и целомудрие паче всех благ избрал еси, и богослов великий и таинник явился еси. Ныне, предстоя престолу Святыя Троицы, испроси мирови мир, и спасение всем нам, восхваляющим тя и поющим Богу: Аллилуия.

Икос 9

Витийством богодухновенным триех вселенских святителей еритичестии соблазны престаша, православная же вера паче и паче превозможе. Сего ради от усердия нашего со умилением и любовию взываем к ним таковая:

Радуйтесь, любовью Православия все житие ваше озарившии; радуйтесь, Единого Бога в Трех Лицах чествовати научившии.

Радуйтесь, Ариево злочестие и хуления иных еретиков низложившии; радуйтесь, лжеучителей пребеззаконная уста светлостью словес ваших заградившии.

Радуйтесь, небесныя трубы, проповедавшия миру Христово Евангелие; радуйтесь, во иерарсех светила три великая.

Радуйтесь, учителя кротости, воздержания, вкупе же и покаяния; радуйтесь, монашествующих добрии учителя и наставницы.

Радуйтесь, Церкви ограждение и Православия поборницы; радуйтесь, в труды апостолов вшедшии и клас добраго исповедания пожавшии.

Радуйтесь, за веру и подвиги венцы нетленные от Пастыреначальника Христа приемшии; радуйтесь, великия труды и подвиги во благоустроении Церкви Христовы подъемшии.

Радуйтесь, трие святителие, велицыи и вселенстии учителяе.

Кондак 10

Спаса Христа умоляти не престай о чтущих память твою, всехвальне Иоанне Златоусте: тебе бо дадесе благодать молитися за ны. Темже и мы, яко ко благоуханнаго мира сосуду, точащому исцеления всем с верою притекающим, со умилением и любовью припадающе, вопием прославльшему тя Богу: Аллилуия.

Икос 10

Стена есте неборимая празднующим святую память вашу и всем притекающим к молитвенному покрову вашему, непостыдная надежда и крепкое заступление. Темже и нам, святии трие святителие, со умилением припадающим к вам, испросите у престола Святыя Троицы милость и благодать во благовременную помощь, да с радостию и благодарением взываем вам:

Радуйтесь, милость и утешение всем верным являющие; радуйтесь, кающихся грешники от сетей диавола избавляющие.

Радуйтесь, благодатных даров усерднии раздаятелие; радуйтесь, всех человек предстательство и покрове.

Радуйтесь, сирых отцы и вдов заступницы; радуйтесь, убогих богатство и болящих исцеление.

Радуйтесь, милосердия ко страждущим немолчнии проповедницы и юных наставницы; радуйтесь, старец питателие.

Радуйтесь, сущих в скорбех утешителие; радуйтесь, странных сопутницы.

Радуйтесь, изнемогающим поможение; радуйтесь, чтущим память вашу радость и спасение низпосылающие.

Радуйтесь, трие святителие, велиции и вселенстии учителяе.

Кондак 11

Пение Пресвятей Троице паче иных принесли есте, святителие Божии, умом, словом, делом и богословным витийством вашим сплетения риторская разрушили есте, наставляюще ны почитати Троицу во Единце и воспевати Ей: Аллилуия.

Икос 11

Светозарную троицу святых иерархов, Василия, царствия тезоименитаго, Григория, Богослова наименованнаго, Иоанна Златоустаго учителя вселенная, глубины Божия испытавших, восхваляюще и светлую память их благоговейно торжествующе, похвальная пения приносим таковая:

Радуйтесь, благознаменитыя трубы Божественных глаголов; радуйтесь, цевницы богодухновенныя.

Радуйтесь, апостольских словес богодухновеннии изъяснителие; радуйтесь, церковных преданий ревнителие.

Радуйтесь, дивная величия Божия всем земнородным поведающие; радуйтесь, славу Божию вашим житием и словом проповедавшии всей вселенней.

Радуйтесь, ко спасению добрии путеводителие и наставницы; радуйтесь, растленных обычаев искоренителие, благих же нравов насадителие.

Радуйтесь, отрицатися плотских похотей и страстей научающи; радуйтесь, врачеве премудрии недугов душевных и телесных.

Радуйтесь, церковная светила, от Трисолнечнаго Света возжженная; радуйтесь, цветы благовоннии райскаго прозябения.

Радуйтесь, трие святителие, велицыи и вселенстии учителяе.

Кондак 12

Благодать Божия обильно излися во устах ваших, треблаженнии: вера православная вами укрепися, и мгла еретических шатаний и лжеучений светом ваших богодухновенных писаний отгнася. Темже, святителие, молитесь ко Христу Богу, да дух ревности вашае о вере и благочестии почиет и на нас, да сподобимся купно с вами пети Святей Троице: Аллилуия.

Икос 12

Поюще и светло празднующе священную вашу, треблаженнии Василие, богослове Григорие и златоустый Иоанне, смиренно молим вас, не престаите молитися Христу о всех, верою призывающих вас и с любовью вопиющих таковая:

Радуйтесь, православных догматов хранителие; радуйтесь, богословия живоноснии источницы.

Радуйтесь, верных сердца божественне веселящи; радуйтесь, яко неослабными подвиги вашими Арий низложися.

Радуйтесь, яко огнем богодухновенных вещаний ваших Евномиева ересь попалися; радуйтесь, яко вашими богодуновенными глаголы Савеллия ересь отгнася.

Радуйтесь, яко мудрование Нестория вами упразднися; радуйтесь, о мире молитвенницы изряднейшии.

Радуйтесь, к Царствию небесному верныя возводящии; радуйтесь, Божии гласи, пречудно нам возгремевшии.

Радуйтесь, пастырей Церкви достоподражательнии образи; радуйтесь, по апостолу, всем вся бывшии.

Радуйтесь, трие святителие, величии и вселенстии учителяе.

Кондак 13

О святителие Христовы и отцы треблаженнии, Василие Великий, церковное светило и столпе непоколебимый, богослове Григорие, уме богопросвещенный, архиерею превеликий, вкупе же и златоусте Иоанне, покаяния твердый проповедниче, небесным спребывающе ликом и ангельским совокупльшесе силам! Нынешнее приемше малое моление наше, испросите нам у Всещедраго Бога вышняя мыслити и деяти, да вечныя муки избегше, небесную жизнь наследим с вами, вопиюще Богу: Аллилуия.

(Этот кондак читается трижды, затем икос 1 и кондак 1)

Икос 1

Ангели земнии и человецы небеснии, святителие Христовы и отцы треблаженнии, поборницы Живоначальныя Троицы, от Нея светом трисолнечным осияваемии и молящиися непрестанно у престола Триипостаснаго Божества о душах наших, услышите ны от сердца к вам взывающия:

Радуйтесь, имущии дерзновение вопити о нас ко Господу; радуйтесь, величии угодницы Святыя Троицы.

Радуйтесь, дарованьми единосущнии; радуйтесь, апостолом единомравнии.

Радуйтесь, яко вашими ученьми дивно просия благодать Христова; радуйтесь, разум свой в послушание веры пленившии.

Радуйтесь, блазии делателие винограда Христова; радуйтесь, от юности Богом благословеннии.

Радуйтесь, скорби жития сего добре претерпевшии и данный вам талант приумножившии; радуйтесь, волю Божию сильным мира сего со многим дерзновением благовестившии.

Радуйтесь, тму нечестия отгнавшии; радуйтесь, всю подсолнечную зарями догматов просветившии.

Радуйтесь, трие святителие, велицыи и вселенстии учителяе.

Кондак 1

Избраннии светильницы Церкви Христовы, Василие, Григорие и Иоанне, ученьми вашими мир просветившии и вся шатания ересей и хульных смущения угасившии! Яко ходатаи спасения нашего суще, молитвами вашими сохраните ны от всяких бед и вечных мук, да с радостью благодаряще вопием вам:

Радуйтесь, трие святителие, велицыи и вселенстии учителяе.

**Молитва трем великим святителям Василию Великому,
Григорию Богослову и Иоанну Златоустому**

О, пресветлии светильницы Церкви Христовы, Василие, Григорие и Иоанне, светом православных догматов вся концы земли озарившии и мечем слова Божия хульных смущения и шатания ересей угасившии! Припадающе к вашему милосердию, с верою и любовью из глубины души вопием: предстояще престолу Пресвятыя, Единосущныя, Животворящия и Нераздельныя Троицы, за Нюже словом, писанием и житием добре подвизастеся и души своя полагасте, всегда молитесь Ей, да укрепит и ны в православии и единомыслии, и непоколебимем даже до смерти исповедании веры Христовы, и во вседушевнем послушании Его Церкви святей; да препояшет ны с высоты силою на вся невидимыя и видимыя враги наша; да соблюдет Церковь Свою незыблему от неверия, суеверия, ересей и раскола; да дарует архипастырем нашим здравие, долгоденствие и во всем благое поспешение; пастырем нашим да подаст духовное трезвение и ревность о спасении пасомых, правителем - суд и правду, воином - терпение, мужество и одоление на враги, сирым и вдовицам - заступление, болящим - исцеление, юным - благое в вере возрастание, старцем - утешение, обидимым - заступление, и всем вся ко временней и вечней жизни потребная, яко да в мире и покаянии, желанием спасения горяще, Господеви работающе, добрым подвигом подвизающесея, течение наше скончаем и сподобимся в небеснем Царствии купно с вами всегда пети и славити пресвятое и великолепое имя Отца, и Сына, и Святаго Духа во веки веков. Аминь.